



Mi sint piçul ta cheste megalopoli dai palaçs a riis, dute plenÆ di silos. O ziri pes stradis e no cjati nissun. No, cjalant ben, alc al è ma a corin vie svelts i piçui eletrons...

Sì, i eletrons a son i unics a vivi ta cheste megalopoli. Se si pues disi che a vivedin...

I circuits eletrics a son lis stradis pes piçulis particulis (no di glesie ma subatomichis).

O sieri il tapon, comedant l'argagn mi sint bulo.

No soi plui piçul ma grant. O met vie la lint di ingrandiment e i struments di precision. La radio cumò e funzione e o saludi chei silos e chei palaçs a riis dulà che a albierrhin i eletrons: valvulis, condensatôrs e altris circuits...

O sintonizi l'imprest: UIU UAU UIU UAU UIU UAU a fasin lis ondis. Ondis OM.

La sbarete e passe par Casablanca, Praha 1, Praha 2 e si ferme su

KALUNDBORG

I ABBA a cjantin une cjançon bielonone.

La vecje none le sint e e pense che lis fantatis che a cjantin a sedin in pereson dentri te scjatolete!

"Torne a vierzi il tapon, Denis, e mole lis fantatis!"

**di Checo Tam**